



Masjid Jamek Shaik Eusoff Dhoby Ghaut masjid pertama miliki ruang perpustakaan digital.

Redzuan Muharam

Disember 17, 2022 @ 4:30pm

Georgetown: Masjid Jamek Shaik Eusoff Dhoby Ghaut, di sini kini menjadi masjid pertama dalam negara lengkap dengan ruang khas Perpustakaan Digital (E-Library) untuk jemaah dan pelajar sekitar Pulau Pinang mendapatkan maklumat dan bahan digital.

Ta hasil keprihatinan dan inisiatif Yayasan Bank Rakyat (YBR) yang bersetuju menyediakan Serambi Ilmu Rakyat (SIR) Corner di Masjid Jamek Shaik Eusoff Dhoby Ghaut, di sini.

Pengurus Besar YBR, Syaiful Rizal Abdul Ghani berkata, langkah itu bertujuan menggalakkan pembacaan dalam platform digital serta membudayakan amalan membaca dalam kalangan rakyat terutama jemaah masjid dan juga penduduk setempat.

"Inisiatif ini adalah yang pertama dilaksanakan di dalam masjid yang mana sebelum ini YBR memfokuskan kepada Institusi Pengajian Tinggi (IPT).

"SIR Corner' adalah projek baru tahun ini (2022) yang bertujuan menyediakan satu ruang yang dilengkapi dengan set komputer, meja dan 50 keahlian E-Library, bagi memudahkan perkongsian maklumat melalui koleksi bahan bacaan digital SIR yang bersesuaian dengan komuniti setempat.

"Diharap komuniti yang hadir ke masjid menunaikan ibadah dapat menggunakan peluang ini sebagai salah satu platform mencari bahan digital dan informasi terkini ketika menunggu waktu solat," katanya ketika berucap dan menyempurnakan Majlis Perasmian E-Library Raudhatul Ulum.

Upacara gimik penyerahan 'SIR Corner' ini kepada Pengerusi Masjid Masjid Jamek Shaik Eusoff Dhoby Ghaut, Yusof Yaacob turut disaksikan oleh Timbalan Ketua Menteri 1 Pulau Pinang merangkap Yang Dipertua Majlis Agama Islam Negeri Pulau Pinang (MAINPP), Datuk Ir Ahmad Zakiyuddin Abdul Rahman.

Hadir sama, Timbalan Pegawai Pendidikan Daerah Timur Laut, Pulau Pinang, Dr. Mohd Siroj Abdul Latiff, Ketua Bahagian Operasi YBR, Mohd Mukhti Abd Rahman dan Pengurus Jabatan Komunikasi Korporat YBR, Mohamad Ghazali Zainal Abidin.

Turut diadakan Program Kem Remaja Mumtaz dengan kerjasama Masjid Jamek Shaik Eusoff Dhoby Ghaut.

Syaiful Rizal berkata, program itu disertai 80 pelajar dalam kariah Masjid Jamek Shaik Eusoff Dhoby Ghaut.

"Mereka terdiri daripada pelajar keluarga B40 dan anggaran (pelajar) yang hadir berusia antara lingkungan tujuh hingga 17 tahun.

"Program ini berlangsung selama tiga hari, bertujuan bagi meningkatkan lagi daya kefahaman agama dalam kehidupan seharian serta meningkatkan pengetahuan fungsi kanak-kanak dan remaja di dalam komuniti.

"Selain misi membantu mereka yang kurang berkemampuan terutama masyarakat luar bandar, pedalaman dan miskin bandar, program berkenaan turut memberi peluang kepada komuniti masjid untuk menjadikan masjid sebagai sebuah hab pendidikan selain ruang untuk beribadah," katanya.

Justeru, Syaiful Rizal berkata, inisiatif seperti itu diharap dapat memberi momentum dalam melahirkan masyarakat yang berpendidikan yang menjadi asas kepada kemakmuran dan kesejahteraan negara untuk jangka masa yang panjang.